

■ COLUMNA

Segir?

DAVID SPINNLER*

Nus essan ina societad, en la quala ins po planisar tut, adina e cun plaina segirtad. Tut è pussaivel. Nagin na sto avair quitads. L'aura è previsibla. Nus pudain ans prestar tut. E sche ina giada n'avess insatge tuttina betg da capitar sco previs, lura avain nus ina segiranza.

Ok. I dat persunas che han accidents u che daventan malsaunas. Ma quai è il destin da singuls. «Tut ok!», pudain nus damai responder sin la dumonda: «Tut ok?».

La societad moderna vul avair reglà tut. Il medem mument tschertganblers e bleras sfidas adina pli grondas, sports adina pli extremists, furmas da vita adina pli extravagantas. Nagin na vul sa fixar sin insatge. Quai sa mussa era tar chaussas banalas sco in rendez-vous: «Giain nus en sortida ensemen?» - «Jau na sai betg anc – jau scriv a tai lura in whatsapp.»

Ina segirtad da planisar na datti insumma betg. Ma igl è sco da raiver senza mai ir ordavant: Ins è vi da la suga, per il cas ch'ins avess da crudar. Ed era per noss temp sco attempadas



ed attempads è tut pront e segirà, cun rentas e cassas da pensiun. Tranteren avessan nus schon gugent in'aventura nunprevisibla che rumpa in pau nossa normalitad segira, dentant mo cun la segirtad ch'insatgi gida, sch'igl avess da capitar insatge. Fake-aventuriers essan nus.

Ussa però essan nus confruntads cun ina aventura che n'è betg ina aventura en in center da divertiment, durant nossas vacanzas. Nagut n'è previsibel. Nagina segiranza. Nagina rait che salva tar ina crudada. Nossas segiranzas che nus avain construi e tut las reservas lieuan sco la naiv en il sulegl da la primavaira. Ma nus na vulain betg ans confruntar cun ina aventura senza segirtad. Quai fa tema.

La situaziun actuala mussa fitg precis il di-

lemma dals umans dad oz: Ins tschertga la libertad e l'indendenza, dentant ina libertad segira. Ins vul adina avair tut las opziuns, però tge gida quai, sch'ins na decida mai per ina?

Dapi in onn avain nus ussa la schanza da snuar quest dilemma. Ma quai na ristgain nus betg, betg anc. Nus empruvain da construir novas segiranzas. Nus vulain per forza che tut daventia puspè normal, planisabel, sco avant.

Nus essan amez ina vaira aventura. Sche nus vulain u betg. Ans laschar involver per propi en questa nova realitad n'è betg simpel. Ans concentrar sin l'aventura e betg sin las proximas elecziuns. Avair fiduzia ch'i dat novas pussaivladads, era sch' il sguard sin il conto da la banca fa tema. Realisar ideas nunpussavlas. Jau na sai betg, sch'i ma gartegia da far quests pass, sch'i gartegia a nus da far tals pass.

Sche gea, alura fissan nus aventuriers pelvaira.

*David Spinnler da Sta. Maria è managiun dal Parc da natura Biosfera Val Müstair.